




# PATNUBAY SA MISA



28 Abril 2024

Ika-5 Linggo ng Pasko ng Pagkabuhay

Taon B

## MANATILING KABAHAGI!

**S**a Ebanghelyo ngayon, sinabi ni Hesus, “Ako ang puno ng ubas, kayo ang mga sanga.” Di ito hamak na salita lamang, kundi isang magandang katotohanan, pagka’t sa ating binyag, tayo ay naging kabahagi niya. Salamat sa ating pagiging tunay na kabahagi ni Hesus, nalalaspap natin ang kaligtasan ng Diyos at tayo’y nakapamumunga ng pagiging karapat-dapat sa bagong buhay sa kanya.

Maaari nating ipagdamdang ang pahayag ni Hesus na “wala kayong magagawa kung kayo’y hiwalay sa akin,” ngunit ito ang katotohanan. Iyon lamang mga tumatanggap dito nang buong kababaang-loob at namumuhay nang alinsunod dito ang tanging nagtatamasa ng kagalakan ng pagiging mga anak ng Diyos, at may kayang mamunga nang sagana para sa buhay na walang hanggan.



### PASIMULA



#### Pambungad

(Ipahahayag lamang kung walang awiting nakahanda.)

**Bagong awit ay ialay sa ating Poong Maykapal. Tanang bansa’y nakinabang sa kanyang kapangyarihan. Aleluya, s’yay idangal!**

#### Pagbati

**P**– Sa ngalan ng Ama at ng Anak at ng Espiritu Santo!

**B**– Amen!

**P** –Ang biyaya ng ating Panginoong Hesukristo, ang pag-ibig ng Diyos Ama, at ang pakikiisa ng Espiritu Santo ay sumainyong lahat!

**B** –At sumaiyo rin!

#### Pagsisisi

**P**–Bilang paghahanda sa pagdiriwang ng mga Banal na Misteryo, alalahanin natin ang ating mga kasalanan at unawaing nakaha-

hadlang ang pagkakasala sa paglago ng ating buhay espirituwal. (Manahimik saglit.)

**P**–Panginoong Hesus, ikaw ay higit na dakila sa lahat, at nababatid mo ang lahat ng nilalaman ng aming mga puso. Panginoon, kaawaan mo kami!

**B** –Panginoon, kaawaan mo kami!

**P**–Panginoong Hesus, lahat ng sumusunod sa iyong mga utos ay nananatili sa iyo at ikaw sa kanila. Kristo, kaawaan mo kami!

**B** –Kristo, kaawaan mo kami!

**P**–Panginoong Hesus, ikaw ang puno ng ubas at kami ang mga sanga. Panginoon, kaawaan mo kami!

**B** –Panginoon, kaawaan mo kami!

**P**–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

**B** –Amen!

#### Papuri

**B** –Papuri sa Diyos sa kaitaan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

## Panalanging Pambungad

**P** –Ama naming makapangyarihan, kaming mga tinubos ay tunguhan mo ngayon sa iyong kagandahang-loob, upang sa pagsampalataya sa Anak mong si Kristo, makamtan ang kalayaan at pamana sa piling mo, sa pamamagitan niya kasama ng Espiritu Santo magpasawalang hanggan.  
**B** –Amen!

### PAGPAPAHAYAG NG SALITA NG DIYOS



**Unang Pagbasa** Gw 9:26-31  
*Matapos magbagong-loob, di naging madali ang buhay para kay Pablo, ngunit pinapatubayan siya ng Panginoon, gaya ng isinasaad sa siping maririnig nating ipahayag.*

**L**– Pagbasa mula sa mga Gawa ng mga Apostol

Noong mga araw na iyon: Pagdating ni Saulo sa Jerusalem, sinikap niyang mapabilang sa mga alagad doon. Ngunit ang mga ito ay takot sa kanya, at hindi makapaniwalang isa na siyang alagad.

Subalit isinama siya ni Bernabe sa mga apostol. Isinalaysay niya sa kanila kung paano napakita ang Panginoon kay Saulo at nakipag-usap dito nang ito’y nasa daan. Sinabi rin niyang si Saulo’y buong tapang na nangaral sa Damasco, sa pangalan ni Hesus.

At mula noon, si Saulo’y kasama-sama nila sa Jerusalem, at buong tapang na nangangaral doon sa pangalan ng Panginoon. Nakipag-usap din siya at nakipagtalo sa mga Helenista, kaya’t tinangka nilang patayin siya. Nang malaman ito ng mga kapatid, dinala nila si Saulo sa Cesarea at pinauwi sa Tarso.

Kaya’t naging matiwasay ang simbahan sa buong Judea, Galilea at Samaria. Ito’y tumatag at lumaganap sa tulong ng Espiritu Santo at namuhay na may pagkatakot sa Panginoon.

Ang Salita ng Diyos!

**B** –Salamat sa Diyos!

**Salmong Tugunan** Awit 21

**B** –*Pupurihin kita, Poon, ngayong kami’y natitipon!*

R. M. Velez

Pu-pu- ri-hin ki-ta, Po- on, nga-  
yong ka-mi'y na-ti---ti---pon!

\* Sa harap ng masunuring mga lingkod mong hinirang, ang handog na panata ko ay doon ko iaalay. Magsasawa sa pagkain yaong mga nagdarahop, aawit ng pagpupuri ang sa Diyos ay dudulog; buhay nila ay uunlad, sasagana silang lubos. **B.**

\* Sa dakilang Panginoon, ang lahat ay magbabalik, ang lahat ng mga lahi ay sasambang may pag-ibig. Mangangayupapang lahat ang palalo’t mayayabang, ang lahat ng mga tao ay yuyuko sa Maykapal, ang narito sa daigdig na nilikhang mamamatay. **B.**

\* Maging lahing susunod pa ay sasamba’t maglilingkod, at mayroong mangangaral sa kanila tungkol sa Diyos. Sa lahat ng sisilang pa’y ganito ang ihahayag, “Sa hinirang niyang bansa ay Panginoon ang nagligtas.” **B.**

**Ikalawang Pagbasa** 1 Jn 3:18-24  
*Ang buhay ng isang Kristiyano ay inaasahang maging isang buhay ng pananampalataya at pagmamahal na isinasagawa. Sa ganito lamang kundisyon natin maaaring sabihing tumatalima tayo sa mga utos ng Diyos.*

**L**– Pagpapahayag mula sa Unang Sulat ni Apostol San Juan

Mga anak, huwag tayong umibig sa pamamagitan ng salita o wika lamang. Ipakita natin ang tunay na pag-ibig sa pamamagitan ng gawa. Dito natin makikilalang tayo’y nasa panig ng katotohanan, at matatahimik ang ating budhi sa harapan ng Diyos sakali mang tayo’y usigin niyon. Sapagkat ang Diyos ay higit sa ating budhi at alam niya ang lahat ng bagay.

Mga minamahal, kung hindi tayo inuusig ng ating budhi, panatag ang ating loob na makalalapit sa Diyos. Tinatanggap natin ang anumang ating hingin sa kanya, sapagkat sinusunod natin ang kanyang mga utos at ginagawa ang nakalalugod sa kanya.

**Ito ang kanyang utos:** manalig tayo sa kanyang Anak na si Hesukristo, at mag-ibigan, gaya ng iniutos ni Kristo sa atin. Ang sumusunod sa mga utos ng Diyos ay nananatili sa Diyos, at nananatili naman sa kanya ang Diyos. At sa pamamagitan ng Espiritu ipinagkaloob niya sa atin ay nalalaman nating nananatili siya sa atin.

Ang Salita ng Diyos!

**B** –Salamat sa Diyos!

**Aleluya** Jn 15:4a.5b

**B** –Aleluya! Aleluya!

Sa Poon ay manatili, siya’y sa atin lalagi. Mamungang maluwalhati.

**Aleluya! Aleluya!**

**Mabuting Balita** Jn 15:1-8

*Inilalarawan ng talinghaga ng puno ng ubas at ng mga sanga ang mahalagang kaugnayang namamagitan kay Hesus at sa atin. Binibigyang-diin din nito na dapat tayong mabuhay nang kaisa niya.*

**P** –Sumainyo ang Panginoon!

**B** –At sumaiyo rin!

**P** –Ang Mabuting Balita ng Panginoon ayon kay San Juan

**B** –Papuri sa iyo, Panginoon!

Noong panahong iyon, sinabi ni Hesus sa kanyang mga alagad:

“Ako ang tunay na puno ng ubas, at ang aking Ama ang tagapag-alaga. Pinuputol niya ang bawat sangang hindi namumunga; at kanya namang pinuputulan at nililinis ang bawat sangang namumunga upang lalong dumami ang bunga.

Nalinis na kayo sa pamamagitan ng salitang sinabi ko sa inyo. Manatili kayo sa akin at mananatili ako sa inyo. Hindi makapamumunga ang sangang hindi nananating nakakabit sa puno. Gayon din naman, hindi kayo makapamumunga kung hindi kayo mananatili sa akin. Ako ang puno ng ubas, kayo ang mga sanga. Ang nananatili sa akin, at ako sa kanya, ang siyang namumunga nang sagana; sapagkat wala kayong magagawa kung kayo’y hiwalay sa akin. Ang hindi nananatili sa akin ay itatapon at matutuyo, gaya ng sanga. Ang gayong mga sanga ay titipunin at susunugin.

**Kung nananatili kayo sa akin at nananatili sa inyo ang mga salita ko, hingin ninyo ang inyong maibigan, at ipagkakaloob sa inyo. Napararangalan ang Ama kung kayo'y namumunga nang sagana at sa gayo'y napatutunayang mga alagad ko kayo."**

Ang Mabuting Balita ng Panginoon!

**B – Pinupuri ka namin, Panginoong Hesukristo!**

### Homiliya

#### Sumasampalataya

**B** – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumaog. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

#### Panalangin ng Bayan

**P** – Sa binyag, tayo'y naging kaisa ni Hesukristo at naging kabahagi ng kanyang banal na katawan. Siya ang puno ng ubas, at tayo ang mga sanga. Ang buhay natin ay nakasalalay sa ating pananatiling kaisa niya. Kung kaya't tayo'y manalangin:

**B – Bukal ng aming buhay, dinggin mo kami!**

\* Nawa'y ang Simbahan ay laging maging mayabong na punong namumunga ng kabangalan, katarungan, at kapayapaan. Manalangin tayo! **B.**

\* Nawa'y lahat ng binyagan ay manatiling kaisa ng Panginoon sa pamamagitan ng pamumuhay alinsunod sa mga turo at pagpapahalaga ng Ebanghelyo. Manalangin tayo! **B.**

\* Nawa'y lahat ng mga tapat na laiko ay manatiling kaisa ni Hesus sa pamamagitan ng paghahandog ng kanilang pang-araw-araw na gawain at taimtim na panalangin. Manalangin tayo! **B.**

\* Nawa'y lahat ng nagkokomunyon ay lumakas sa kanilang pakikiisa kay Hesus sa pamamagitan ng buhay-paglilingkod sa kapwa. Manalangin tayo! **B.**

\* Nawa'y lahat ng nasa bingit na ng kamatayan ay manatiling nakakapit kay Hesus bilang natatanging bukal ng buhay at kaligtasan. Manalangin tayo! **B.**

**P** – Panginoong Hesus, bunsod ng aming pananalig sa tulong ng iyong biyaya, muli kaming matibay na nangangakong tatalikdan ang anumang maglalayo sa amin sa iyo at sa aming kapwa. Panatiliin mo kaming kaisa mo tulad ng iyong pakikiisa sa Ama at sa Espiritu Santo magpakailanman. **B – Amen!**

#### PAGDIRIWANG NG HULING HAPUNAN



**P** – Manalangin kayo . . .

**B** – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

#### Panalangin ukol sa mga Alay

**P** – Ama naming Lumikha, sa paghahain ng banal na pagpapalitan ng iyong mga kaloob at ng aming alay, kami'y pinapagsasalo mo sa iyong buhay na namumukod-tangi at walang kapantay. Ipagkaloob mong ang aming pakikinabang sa iyong pakikisamang aming maaasahan ay siya ring umiral sa aming pamumuhay araw-araw, sa pamamagitan ni Hesukristo kasama ng Espiritu Santo magpasawalang hanggan. **B – Amen!**

#### Prepasyo ng Pagkabuhay II

**P** – Sumainyo ang Panginoon!

**B** – At sumaiyo rin!

**P** – Itaas sa Diyos ang inyong puso at diwa!

**B** – Itinaas na namin sa Panginoon!

**P** – Pasalamat natin ang Panginoong ating Diyos!

**B – Marapat na siya ay pasalamat!**

**P** – Ama naming makapangyarihan, tunay ngang marapat na ikaw ay aming pasalamat ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Sa paghahain ng sariling buhay at sa pagkabuhay ng Anak mong mahal, nabuksang ganap ang iyong tahanan at kaming pinaghaharian mo'y naging kasambahay. Sa pagkamatay niya sa krus, nalupig ang kamatayan. Sa kanyang pagkabuhay, naging buhay siya ng tanan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

**B – Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!**

**Pinagpala ang naparirito sa ngalan ng Panginoon. Osana sa kaitaasan!**

#### Pagbubunyi

**B** – Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.

#### PAKIKINABANG



**B** – Ama namin . . .

**P** – Hinihiling namin . . .

**B** – Sapagkat iyo ang kaharian at ang kapangyarihan at ang kapurihan magpakailanman! Amen!

#### Paanyaya sa Kapayapaan

#### Paghahati-hati sa Tinapay

**B** – Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

**Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.**

### Paanyaya sa Pakikinabang

**P** – Ito si Hesus, ang bukal ng ating buhay, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.  
**B** – Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

### Antipona ng Pakikinabang

(Ipahahayag lamang kung walang awiting nakahanda.)

**Ako ang puno ng ubas, kayo’y aking sangang lahat. Ang manatiling matapat, magbubunga nang marapat. Aleluya sa Mesiyas!**

### Panalangin Pagkapakinabang

**P** – Ama naming mapagmahal, manatili kang kapiling ng iyong sambayanan na ngayo’y pinapakinabang mo sa iyong sariling buhay at gawin mong kami’y pasulong na makahakbang mula sa dati naming pagkamakasalanan patungo sa pagbabagong nagdulot ng iyong kabutihan, sa pamamagitan ni Hesuskristo kasama ng Espiritu Santo magpasawalang hanggan.

**B** – Amen!

### PAGWAWAKAS



**P** – Sumainyo ang Panginoon.

**B** – At sumaiyo rin!

**P** – Magsiyuko kayo at ipanalangin ang pagpapala ng Diyos. (Manahimik saglit.)

– Mabuhay nawa sa inyo ang Panginoon at palakasinyo kayo ng Kanyang biyaya. Tulungan Niya nawa kayong manatiling malapit sa Kanya sa panalangin at pagkalooban nawa kayo ng tunay na pagmamahalan.

**B** – Amen!

**P** – Tulungan Niya nawa kayong maging tapat sa Kanya nang buong puso at pagindapatin

kayo sa Kanyang mga pangako.

**B** – Amen!

**P** – Gawin nawa kayo ng Panginoong mga kasangkapan ng pakikipagkaisa at pagkikipagtulungan sa inyong mag-anak at lipunan.

**B** – Amen!

**P** – Pagpalain nawa kayo ng makapangyarihang Diyos: Ama, Anak, at Espiritu Santo.

**B** – Amen!

**P** – Tapos na ang Misa. Humayo kayo sa kapayapaan ni Kristo.

**B** – Salamat sa Diyos!

## HAWAK LANG ‘TOL!

*Kalakbay at Katoto*

Uso sa larangan ng politika ang tinatawag nilang laglagan. Kapag hindi na kapakinabang ang isang tao, inilalaglag sa ere, kumbaga . . . biglang parang hindi na kakilala, sapagka’t wala nang silbi, wala nang mahihita ika nga.

Wag na kayo lumayo. Tingnan n’yo ang mga bloggers na noong nakaraang administrasyon ay walang patid maghapon ang livestream sa social media. Nasaan na sila ngayon? At ano na ang kanilang pinagkakaabalahan? Laglagan time na!

Hindi ito ang diwa na lumulutang nang maliwanag pa sa sikat ng araw sa mga pagbasa sa araw na ito. Walang laglagan sa Panginoon. Bagkus ang hinihingi niya at tagubilin sa atin ay ang kabaligtaran – ang manatiling nakahawak, ang magpatuloy na na nakakapit sa kanya tulad ng isang sanga ng ubasan, na hindi kailanman puedeng mabuhay kung bibitaw at magsasarili.

Alam nating lahat kung ano ang kahulugan ng kumapit – Kapit-patalim tayo sa ating cellphone maghapon at magdamag. Sa marami nang dekada, linyang maliwanag ito ng PLDT – “keeping you in touch.” Uso pa noon ang telebabad. Nag-aaway ang

mga magka party-line noong araw dahil sa telebabad ng mga bagets noong panahong iyon.

Pero sa panahon natin ngayon, wala nang dating ang “keeping you in touch.” Bakit? Sapagka’t una sa lahat, atats na atats tayo sa ating gadyet. Mas atats pa tayo sa gadyet, kesa sa ating magulang na malamang ay nasa abrod, nasa Dubai o Saudi o USA, o Canada – sa lahat ng lupalop ng mundo!

Kay rami ngayong mga bata na nakalilimot magsimba, pero hindi nakalilimot magdala ng gadyet. Apekted mats sila kapag alaws load.

Kelangan natin ng espirituwal na load tuwina. At hindi ito simpleng pagiging in touch. Kelangan natin ng higit pa. Kelangan nating kumapit at humawak sa Panginoon, tulad ng ang sanga ay nakakabit at karugtong ng puno ng ubasan. “Manatili kayo sa akin at manatili ako sa inyo. Hindi makapamumunga ang sangang hindi nananatiling nakakabit sa puno. Gayon din naman, hindi kayo makapamumunga kung hindi kayo manatili sa akin. Ako ang puno ng ubas, kayo ang mga sanga.”

Hawak lang kay Lord, ‘tol!



**WORD AND LIFE  
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: [www.wordandlife.org](http://www.wordandlife.org)

• E-mail: [wordandlifepublications@gmail.com](mailto:wordandlifepublications@gmail.com) • FB: Word And Life Publications

• Editorial Team: Fr. B. Nolasco, Fr. J. Camaya, Fr. C. Dimaranan, V. David, R. Molomog, D. Daguio

• Illustrations: A. Sarmiento, B. Cleofe • Circulation: R. Saldua